

Churf. Meinzischen Mundtkochs.

5

beydes/ Frú oder Abends/ der Herr/ ordenlichem angefertigtem brauch nach/
gemeinlich zu essen pfleg vnd lust habe. Vnd wiewol der Appetit seines Her-
ren nicht leichtlich zu erkennen vnd ab zunehmen/ jedoch soler/ so viel müt-
lich/ allwegen in guter bereitshafft stehen / damit dem Herrn ein genügen
geschehe. Es ist wol nicht ohn/ daß daher/ wann nemlich im essen geben kein
gewisse ordnung gehalten wirt/ die Speisen gemeinlich schändtlich verder-
ben/ die Voressen trucknen eyn / die Gemüß vnd andere gesottene Speiß
verkothen sich vnd werden kalt/ die Gebratens verdorren vnd verlieren iren
Safft/ Jedoch sol ein guter erfahrner Koch sehen/ das er seinen Herrn auff
beste/ als er kan vnd mag/ tractiere vnd speise. Wann aber in einer Hof oder
Hausshaltung im essen gewisse Zeit/ Stundt vnd gute Ordnung gehalten
wirdt / alsdann sol ein guter Koch nicht weiters sorgen/ dann er mit seinem
Kochen ganz löblich vnd wol bestehen wirt. Die kleinen Voressen soler mit
sonderm fleiß zurichten / doch gehet nicht viel Zeit drauff / sondern mögen
bald / in dem man den Tisch berettet / decket vnd zurichtet / gekocht werden.
Die Gebratens sol er an den Spiessen/ biß daß man sie aufftragen wil ste-
cken lassen/ vnd alle andere Sachen/ dem Herrn sein schmackhaff-
tig vnd safftig/ auffsetzen lassen/ so wirt der Meister
Koch geburliche Ehr/ Ruhm vnd Lob
darvon tragen.

b

Vom